



Fasnacht 2013

## Alti Basler Dante

sit 1947

### Ueli's Grip(p)en

Summergrippe, Wintergrippe  
Alli hämer ganz fescht glitte.  
Doch was jetzt chunnt isch no viel schlimmer;  
packt 's ganzi Land nit nur 's Krankezimmer.

Es bahnt sich aa e grossi Gfohr ;  
wird jetzt entschide, in dämm Johr.  
E Gripe und zwar ganz e schnälli  
will me kaufe, mir hängt dr Lälli.

Was seisch, du weisch nit was i mein ?  
Wo läbsch denn du, blibsch nur deheim ?  
Dr Muurer seit dä dir denn nüt ?  
I glaub : du bisch nit by de Lüt ?

Dr Gripen isch e schnälle Jet.  
Wo d' Armee im Aug jetzt het.  
Die alte Jets sin nümme guet ;  
Die kasch dr stecke an di Huet.

Ei Gripen het dr Ueli scho.  
Vom Evelin grad übercho ;  
dä muess är zwar zerscht zämmebaue.  
So ka är ihn sich gnau beschaue.

Weiss wieviel Teili as är het,  
ka blindlings denn sogar im Bett ;  
au sage wo dr Fähler ligt,  
wenn so ne Jet am Bode blibt.

Me het no andri Flugj welle.  
Das weiss i vo verlässlicher Quelle.  
In Frankrich het me welle kaufe ;  
dr Rafale dägi besser laufe.

Ach was dä isch uns doch viel z' gross ;  
choschtet meh und isch e Gschoss.  
Zu däm hän die uns in der Nase,  
bezeichne uns als Stüroase.

Lueg das isch wie bim Tennisspiele ;

Dien mir doch emol dört ane schiele :  
Dr Roger isch kei Kampfmaschine  
wie dr Djokovic duet schine.

Är isch kei Ries wie dr Isnerfall,  
kei Kraftpaket wie dr Nadal  
doch är het vo allem au e kli  
und isch drum voll und ganz derbi.

Mir Alti Dante gsehn das besser  
und bau 's Flugl eifach gresser.  
Mit alt bewärter Technik drinne  
wärde mir dr Krieg scho gwinne.

E Vorteil het das Flugl do,  
mit altem Bezin kasch 's fliege lo.  
Räschtbeständ het's sicher neime  
so wämmer jetzt vom Fliege dreime.

\*\*\*\*\*

*D Ladäärne-Uusstellig uff em Minschterplatz und  
D' Waage- und Reggwisyte-Uusstellig bi dr  
Kasäärne sin vom Määntig znacht bis am Mittwoch  
demoorge! Deert und an de 3 Verkaufsständ (CINS)  
in dr Stadt ka me n au alli Zeedel und  
Schnitzelbängg, d' Blaggedde und dr Rädäbäng  
kaufe.*

\*\*\*\*\*

*Uffbasse!  
D' Zeedelläsete isch am Sunntig noh dr Fasnacht,  
am 24. Hornig am ene neye Ort:  
Im Lokal vo dr Baseldytschi Bihni im Lohnhof,  
17 – 19 h! Dr Ytritt isch vergääbe.  
Me ka s' Tringge aber am Ort bstelle.*

\*\*\*\*\*